

VENDIM
Nr. 490, datë 26.6.2026

PËR KRIJIMIN, ORGANIZIMIN DHE FUNKSIONIMIN E INSPEKTORATIT
QENDROR TË MBIKËQYRJES SË TREGUT

Në mbështetje të nenit 100 të Kushtetutës, të pikave 1 e 2, të nenit 26, të ligjit nr. 99/2024, “Për inspektimin në Republikën e Shqipërisë”, të ndryshuar, dhe të nenit 6, të ligjit nr. 90/2012, “Për organizimin dhe funksionimin e administratës shtetërore”, me propozimin e ministrit të Ekonomisë dhe Inovacionit, Këshilli i Ministrave

VENDOSI:

I. DISPOZITA TË PËRGJITHSHME

1. Krijimin, organizimin dhe funksionimin e Inspektoratit Qendror të Mbikëqyrjes së Tregut, në vijim “IQMT”, si institucion qendror publik, buxhetor, në varësi të ministrit përgjegjës për tregtinë dhe me seli në Tiranë.

2. IQMT-ja financohet nga buxheti i shtetit dhe nga burime të tjera të ligjshme, në përputhje me dispozitat ligjore në fuqi. Buxheti i IQMT-së përbën zë të veçantë në buxhetin e ministrisë përgjegjëse për tregtinë.

3. IQMT-ja ka si mision garantimin e sigurisë së produkteve për konsumatorët, të vendosura në treg dhe në shërbim/në përdorim, nëpërmjet aktiviteteve mbikëqyrëse, sipas legjislacionit përkatës në fuqi. IQMT-ja është, gjithashtu, përgjegjëse për të monitoruar respektimin e të drejtave të pronësisë intelektuale, si dhe të të drejtave të tjera, sipas fushës së veprimtarisë institucionale, objekt inspektimi sipas këtij vendimi.

II. PËRGJEGJËSITË FUNKSIONALE TË INSPEKTORATIT QENDROR TË MBIKËQYRJES SË TREGUT

1. IQMT-ja është struktura përgjegjëse për mbikëqyrjen e tregut të produkteve të destinuara për konsumatorët, sipas legjislacionit për sigurinë e përgjithshme të produkteve joushqimore dhe legjislacionit për tregtimin e mbikëqyrjen e tregut të produkteve joushqimore, për të gjitha produktet apo grup-produktet joushqimore.

2. IQMT-ja është, gjithashtu, përgjegjëse për inspektimin e zbatimit të kërkesave të detyrueshme ligjore në fushën e:

a) mbrojtjes së konsumatorëve, sipas përcaktimit të ligjit për mbrojtjen e konsumatorëve;
b) mbrojtjes së pronësisë industriale, sipas përcaktimit të legjislacionit për pronësinë industriale;

c) garantimit të mbrojtjes dhe të respektimit të të drejtave të autorit dhe të drejtave të tjera të lidhura me to, sipas përcaktimit të legjislacionit për të drejtat e autorit dhe të drejtat e tjera të lidhura me to;

ç) inspektimit metrologjik, sipas legjislacionit për metrologjinë;

d) etiketimit për konsumin e energjisë dhe burimeve të tjera të produkteve me ndikim në energji, sipas përcaktimit të legjislacionit për informacionin e konsumit të energjisë dhe burimeve të tjera të produkteve me ndikim në energji;

dh) kontrollin e detergjentëve të vendosur në treg sipas dispozitave të ligjit për detergjentët.

3. IQMT-ja ushtron veprimtarinë, në përputhje me legjislacionin për inspektimin në Republikën e Shqipërisë dhe legjislacionin e posaçëm të zbatueshëm në secilën nga fushat e inspektimit, të përmendura në pikën 2, të këtij kreu, si dhe çdo përgjegjësi tjetër, të përcaktuar me ligj apo akt nënligjor.

III. ORGANIZIMI DHE FUNKSIONIMI I IQMT-së

1. IQMT-ja organizohet si drejtori e përgjithshme me juridiksion në të gjithë territorin e vendit.

2. Struktura dhe organika e IQMT-së miratohen me urdhër të Kryeministrit, me propozim të ministrit përgjegjës për tregtinë, sipas përcaktimeve të legjislacionit në fuqi për organizimin dhe funksionimin e administratës shtetërore. Përpara dërgimit të propozimit merret mendimi i Inspektoratit të Përgjithshëm.

3. IQMT-ja drejtohet nga kryeinspektori qendror, i cili organizon dhe drejton të gjithë veprimtarinë e saj, si dhe përgjigjet e raporton për veprimtarinë inspektuese përpara ministrit përgjegjës për tregtinë dhe inspektorit të përgjithshëm.

4. Kryeinspektori qendror drejton veprimtarinë e IQMT-së dhe është përgjegjës, për:

a) organizimin, koordinimin e funksionimin, cilësinë dhe efektivitetin e veprimtarisë së IQMT-së, nëpërmjet:

i. organizimit të punës për kryerjen e veprimtarisë inspektuese për të arritur përputhshmërinë ligjore me legjislacionin e sigurisë së përgjithshme të produkteve joushqimore, legjislacionit për tregtimin e mbikëqyrjen e tregut të produkteve joushqimore, legjislacionit të pronësisë industriale dhe legjislacionit për mbrojtjen e të drejtave të autorit të subjekteve të inspektimit;

ii. monitorimit dhe vlerësimit të efikasitetit të veprimtarisë inspektuese së fushës përkatëse, si dhe të masave të ndërmarra për arritjen e objektivave;

iii. organizimit të punës për hartimin dhe propozimin e përmbajtjes të dokumenteve standarde për inspektimin e fushës përkatëse dhe zbatimin e tyre në këto fusha;

iv. zbatimit të politikave sektoriale, strategjive dhe programeve të inspektimit të fushës.

b) menaxhimin e burimeve njerëzore;

c) menaxhimin e burimeve financiare, zbatimin dhe administrimin e buxhetit të miratuar, si dhe përgatitjen e projektbuxhetit për vitin e ardhshëm, të cilin ia paraqet ministrit përgjegjës për tregtinë, në përputhje me legjislacionin në fuqi, në funksion të veprimtarisë së inspektoratit, si dhe në përmbushje të politikave të institucionit;

ç) nxjerrjen e akteve administrative të përcaktuara sipas legjislacionit në fuqi për inspektimin e sigurisë së përgjithshme të produkteve joushqimore, tregtimit dhe mbikëqyrjes së produkteve joushqimore, inspektimit në fushën e metrologjisë, pronësisë industriale dhe mbrojtjes të të drejtave të autorit;

d) sigurimin e unifikimit të praktikave të mbikëqyrjes të tregut dhe të inspektimit në fushën përkatëse të përgjegjësive;

dh) sigurimin e cilësisë dhe efektivitetit të veprimtarisë së IQMT-së;

e) informimin e publikut për veprimtarinë e IQMT-së, në përputhje me legjislacionin në fuqi;

ë) bashkëveprimin dhe bashkërendimin e veprimtarisë së IQMT-së me institucione të tjera shtetërore për fushën përkatëse të përgjegjësive, si dhe me strukturën administrative përgjegjëse për politikat e mbikëqyrjes së tregut në ministrinë përgjegjëse për tregtinë;

f) përfaqësimin e IQMT-së në marrëdhënie me të tretët;

g) propozimin për miratim ministrit të rregullores së brendshme të IQMT-së dhe mbikëqyrjen e zbatimit të saj;

gj) kryerjen e çdo funksioni tjetër si kryeinspektor apo titullar institucioni, sipas legjislacionit në fuqi.

5. Marrëdhëniet e punës së kryeinspektorit qendror dhe inspektorëve të IQMT-së rregullohen sipas dispozitave të Kodit të Punës, dispozitave të ligjit për inspektimin dhe akteve nënligjore në zbatim të tij.

6. Marrëdhëniet e punës për punonjësit e tjerë, që nuk ushtrojnë funksione inspektuese,

rregullohen sipas dispozitave të Kodit të Punës.

7. Kryeinspektori emërohet në detyrë nga Kryeministri, me propozimin e ministrit përgjegjës për tregtinë, sipas përcaktimeve të vendimit nr. 778, datë 19.12.2025, të Këshillit të Ministrave, “Për përzgjedhjen, emërimin, vlerësimin e rezultateve në punë, disiplinën, shkarkimin dhe lirimin nga detyra të Kryeinspektorit, inspektorit të Inspektoratit Qendror dhe Inspektoratit të Përgjithshëm”.

8. Rregullorja për metodat e brendshme të punës dhe sjelljen e personelit të IQMT-së miratohet nga ministri përgjegjës për tregtinë, me propozimin e kryeinspektorit qendror.

9. IQMT-ja identifikohet me stemën dhe vulën zyrtare.

10. Stema e IQMT-së përbëhet nga stema e Republikës së Shqipërisë dhe shënimet: “Republika e Shqipërisë, Ministria e Ekonomisë dhe Inovacionit, Inspektorati Qendror i Mbikëqyrjes së Tregut”, në përputhje me përcaktimet e vendimit nr. 474, datë 10.7.2003, të Këshillit të Ministrave “Për mënyrën e përdorimit të stemës së Republikës, si dhe raportin e përmasave të saj”, të ndryshuar.

11. Vula e IQMT-së ka formën dhe elementet e përcaktuara në vendimin e Këshillit të Ministrave që përcakton rregullat e prodhimit, të administrimit, të kontrollit dhe ruajtjes së vulave zyrtare. Vulat prodhohen, administrohen dhe ruhen, në përputhje me legjislacionin në fuqi dhe përmbajnë shënimin identifikues “Inspektorati Qendror i Mbikëqyrjes së Tregut”.

IV. DISPOZITA KALIMTARE DHE TË FUNDIT

1. Me hyrjen në fuqi të këtij vendimi, Inspektorati Shtetëror i Mbikëqyrjes së Tregut riorganizohet në Inspektoratin Qendror të Mbikëqyrjes së Tregut.

2. Nëpunësit civilë aktualë të Inspektoratit Shtetëror të Mbikëqyrjes së Tregut, të cilët kryejnë funksione inspektuese, trajtohen sipas dispozitave kalimtare të ligjit nr. 99/2024, “Për inspektimin në Republikën e Shqipërisë”, të ndryshuar.

3. Nëpunësit civilë aktualë të Inspektoratit Shtetëror të Mbikëqyrjes së Tregut, të cilët kryejnë funksionet horizontale, në kuptim të ligjit nr. 90/2012, “Për organizimin dhe funksionimin e administratës shtetërore”, trajtohen sipas dispozitave të legjislacionit për nëpunësin civil në rastin e mbylljes dhe ristrukturimit të institucionit.

4. Punonjësit aktualë të Inspektoratit Shtetëror të Mbikëqyrjes së Tregut, marrëdhëniet e punës të të cilëve rregullohen në bazë të dispozitave të Kodit të Punës, vijnë marrëdhëniet e punës pranë Inspektoratit Qendror të Mbikëqyrjes së Tregut, në përputhje me strukturën organizative të miratuar.

5. Procedurat për riorganizimin e Inspektoratit Shtetëror të Mbikëqyrjes së Tregut përfundojnë brenda 6 (gjashtë) muajve nga data e hyrjes në fuqi të këtij vendimi dhe përgjatë kësaj periudhe ngarkohet Inspektorati i Përgjithshëm për të kryer përditësimet e nevojshme në sistemin *E-Inspektimi*.

6. Deri në fillimin e funksionimit të plotë të Inspektoratit Qendror të Mbikëqyrjes së Tregut, Inspektorati Shtetëror i Mbikëqyrjes së Tregut vazhdon funksionimin e tij, sipas strukturës dhe organikës së miratuar.

7. Me hyrjen në fuqi të këtij vendimi, vendimi nr. 36, datë 20.1.2016, i Këshillit të Ministrave, “Për krijimin, organizimin dhe funksionimin e Inspektoratit Shtetëror të Mbikëqyrjes së Tregut”, i ndryshuar, shfuqizohet.

8. Ngarkohen Inspektorati i Përgjithshëm, Ministria e Ekonomisë dhe Inovacionit, Departamenti i Administratës Publike dhe Inspektorati Qendror i Mbikëqyrjes së Tregut për zbatimin e këtij vendimi.

Ky vendim hyn në fuqi pas botimit në Fletoren Zyrtare.

ZËVENDËSKRYEMINISTËR

Albana Koçiu